

HEADLINES (MORNING)

1. Tunlai mila Kut hnathawh hlawk tura inzirtirna beihpui thlakna Viksit Krishi Sankalp Abhiyan chu Mizoram khaw 700 chuangah kalpui mek a ni.
2. Bairabi leh Sairang inkar rel kawng endik mekah tukin dar 9 atangin rel tlan chak dan endikna- speed trial neih a ni dawn.
3. Prime Minister Narendra Modia chuan ramchhung sector hrang hrangah hmasawna ropui tak hmuh tur a awm a ti.
4. Manipur Chief Minister hlui N. Biren Singh leh Rajya Sabha MP Leishemba Sanajaoba te chuan state chhung buaina thlang leh mekah central hruaitute New Delhi ah an hmu.

<><><>

VKSA

Tunlai mila Kut hnathawh hlawk tura inzirtirna beihpui thlakna Viksit Krishi Sankalp Abhiyan (VKSA) chu Mizoram khaw 700 chuangah kalpui mek a ni.

Agriculture Directorate-a Joint Director leh VKSA Nodal Officer Pu B. Ramnunsanga chuan Viksit Krishi Sankalp Abhiyan in a tum ber chu loneitute hnenah an thlai leh ran vulh te a lo pun theih nan an hriat tur tul ang zawng zawng an hrilh ang a, loneitute hnen atangin an mamawh leh an harsatna an zir pah nghal dawn a ti a. Loneitute hnenah an thlai chin kawngah leh an mamawhna hrang hrangahte an hriat tur tawngka leh ziakin anmahni hmun ngeia va hrilh hriat a nih thu a sawi a ni.

Sorkar laipui chuan ram pumah buh leh bal tharchhuah a lo pun theih nan Fur (Kharif) leh Thlasik (Rabi) ah te beihpui thlak tura hma a lak angin, Thlai chin hmaa loneituten an hriat tur ang an hriat theih nan Mizoramah chuan May ni 29 atanga June ni 12 thlang VKSA hi neih tura ruahman a ni a, thlasik thlai (Rabi) chin hma in October ni 1 atanga ni 15 inkarah VKSA campaign hi neih a ni leh dawn bawk a ni.

VKSA hi Champhai District chhunga khaw hrang hrang Ngur, Zote, Bethel, Zokhawthar, Melbuk, Mualkawi, Vaikhawtlang, Khuangphah leh Hnahlan ah te KVK Champhai District, Khawzawl leh Agriculture, Horticulture leh Veterinary Sciences Department te leh Agricultural Technology Management Agency (ATMA) a mithiam ten nimin khan an chhunzawm leh a ni.

He campaign hi team 3 a insiamin District tina KVK a Subject Matter Specialist (SMS) te chu team leader an ni a, team tin te hian nikhatah khua 3 zel an tlawh chhuak a ni.

<><><>

CM

Ramri kaltlanga dan bawhchhiatna venna kawnga chak zawka hnathawktuten hma an lakho theihna tura a din, Mizoram Security Coordination Committee te chu an chairman Pu Lalduhoma, Chief Minister hovin nimin khan Aizawlah an thukhawm a. Hei hi an thutkhawm tum 1-na a ni.

Meetingah hian Indo- Myanmar ramri dinhmun te, Indo - Bangladesh ramri dinhmun te, Mizoram leh a thenawm state ramri dinhmun te, ramri paltlanga ruihhlo leh ralthuam tawlhruk chungchang te leh hmalak zel dan tur thil pawimawh te an sawi a. Tripura leh Mizoram ramri, New Kawnpui vela Tripura State Rifles ten temporary check post leh sentry shed an rsiam te chu Chief Secretary leh DGP level-a inbiak a nih hnua Tripura Rifles hian an hmunhma te tichhiaa an kalsan thu tarlan a ni.

Mizorama suahsualna record tam ber chu rukruk case a ni mek a, kum tling lo pawngsual (POCSO Act) bawhchhiatna pawh a tam hle nia tarlan a ni. ND& PS Act hnuaiah case 338 nikum 2024 chhung khan register a ni a, kuminah hian May thla thlangin case 114 ziah luh a ni.

Methphetamine tablet hi kumin chhungin May thla thleng khan kg 648.824 man a ni tawh a, Cheng vbc. 84 man hu vel nia chhut a ni. Crystal Meth hi Kg 5.169 an man tawh bawk a, cheng vbc. 15.5 man vel nia chhut a ni. Nikum 2024 chhung khan ralthuam leh puak thei case 47 ziah luh a ni a, mi 56 man an ni a. Kuminah May thla thleng khan case 34 register tawh niin mi 51 man tawh an ni.

Heng bakah hian ILP chungchang te, One Nation One Ration Card anga Manipur atanga himna zawnga rawn insawn ten ration card an neih ve vekna tur te, international tourist Mizoram rawn tlawh duh ten permit rang zawk a an neih theih dan tur te pawh an sawi.

He meetingah hian Home Minister Pu K. Sapdanga, Excise & Narcotics Minister Pu Lalnghinglova Hmar, Chief Secretary Pu Khilli Ram Meena, Pu Anil Shukla, DGP bakah Mizoram chhunga sawrkar laipui leh state hnuaia venhimna lam thawktu hrang hranga thuneitu sang te chu member an ni.

<><><>

CM & CYMA

Central YMA hruaituten nimin khan Chief Minister Pu Lalduhoma chu a Pisa-ah kawmin, Mizoram Lokayukta hnuaia Investigation Wing siam chungchang an sawipui a, The Mizoram Lokayukta Act, 2014 (amendment) a Investigation tih lai paih tawh Act a dah let leh tura ngenna an thlen bawk.

Hei bakah hian CYMA hruaitute chuan kumin March ni 15-a Union Home Minister Amit Shah lo zin tuma a tiam pahnih - Thingsulthliah a YMA rama Conference Centre sakna tur cheng vbc 100 dilna kal zel leh Narcotics Control Bureau (NCB) kaltlanga ruihhlo dona tur sum dilna thehluh tawh te nawr an duh thu an sawi a ni.

Central YMA hruaitute chuan Ruihhlo ngaite enkawlina atana Sethawn a Jordan Centre cheibawl rawtna an thlen bawk a, CM chuan Jordan Centre enkawl chungchangah Sawrkar leh Kohhran te an indawr mek thu leh Sawrkarin ruihhlo ngaite enkawlina turah ngaihtuahna a sen mek thu a lo hrihl a. Kumin October thla a YMA Inkhawmpui Lian neihna tur Sakawrdai leh Mauchar inkar kawng pawh chak zawka siamthat hna kal pui a nih tur thu Central YMA hruaitute a hrihl bawk a ni.

Chief Minister hian Central YMA hruaitute thu thlen chu lo bawhzui a nih tur thu a hrihl ani.

<><><>

SPEED TRIAL

Bairabi leh Sairang inkar rel kawng endik mekah tukin dar 9 atangin rel tlan chak dan endikna- speed trial neih a ni dawn.

Northeast Frontier Railway (NFR)-a Mizoram awm chilhtu Deputy chief engineer (Construction) Pu Harjema Meena-a’n Akashvani Aizawl a hrihl danin speed trial hi zing dar 9 atanga neih tan tur a ni a, chetsualna thleng thei laka inven nan rel kawng bulhnaiah tumah awm phal a ni lova, relkawng kanna tur bika siamah te phal hun bitukah chauh relkawng kan tur a ni bawk a ni.

Kar kalta Nilaini khan rel bungraw phur tlan chak theih zawng tur enchhin a lo ni tawh a. Hemi ni hian darkar khata km 35 leh 50 a chak a tlantir chhin a ni a. Vawiin hian Darkar khata km 110 tlantir chhin tum a nih thu Pu Harjema Meena chuan a sawi a ni.

Puan tawh angin kar kalta Zirtawpni atang khan Commissioner of Railway Safety (CRS) Pu Sumeet Singhal an Bairabi leh Sairang/Sihhmui rel chawlhmun inkara rel kawng siam zawh tawh chu a him leh him loh a endik tan a. Ngawrh takin a thawhpuite nen endik hna hi an thawk chhonzawm zel a, endik hna zawh fel a nih hnu, a him ngei e tih a fiah a, chu chu Ministry of Railways thuneitu sangte hnena thehluh a nih hunah rel hi Bairabi atanga Sairang/Sihhmui thlengin a tlan thei tawh dawn a. July thla tawp lamah hawn theih beisei a ni.

Hemi hma hian Pu Sumeet Singhal hian Bairabi leh Hortoki inkar rel kawng hi nikum July thla chawhnu lam khan a him leh him loh endik tawhin August thla khan a

him tawh tih a fiahna a thehlut tawh a. Tuna a endik hi hemi kawng km 51 chuang endik hna a zawhna tur a nih thu NFR-a chief public relation officer (CPRO) Pu Kapinjal Kishore Sharma chuan a lo sawi tawh a ni.

<><><>

HOSPITAL NQAS

Ramchhunga sawrkar damdawi in tha bik tehnaah Mizoram chhunga damdawi in pahnih - Mamit District Hospital leh Bukpui PHC, Kolasib District te an tel thar.

Health & Family Welfare Department, National Health Mission, Mission Director Dr. Lily Chhakchhuak chuan ramchhunga sawrkar damdawi in tha bik tehna, National Quality Assurance Standards (NQAS)-ah Mamit District Hospital chuan zaa 86.09 an hmu tih a sawi a. NQAS certification hi Department pasarih – Accident & Emergency, Blood Bank, Paediatric Ward, Labour Room, Laboratory, Radiology, leh General Administration-ah te an hmu a ni. Heti hian Mizoram District Hospital 7 (Pasarih) in NQAS National Certificate an nei mek a ni.

Mamit District Hospital bakah hian Primary Health Centre zinga NQAS national certificate hmu thar chu Kolasib District Bukpui PHC niin, point zaa 94.94 an hmu a. PHC zingah NQAS National Certificate hmu hi 12 an awm ta a ni.

Heti hian Mizoram chhunga Sawrkar damdawi in 21 te chu NQAS national certificate nei tawh an ni a. Tunah hian sawrkar damdawi in 26 velin state level certificate nei tawhin national certificate hi an dil mek bawh a ni.

Health Minister, Pi Lalrinpui chuan, India rama damdawi in tha bik thlan chhuah zingah Mizorama damdawi in an awm belh zel chu Mizoram tan mellung pawimawh tak a nih thu leh damdawi in, district leh state-a thawktu zawng zawng te thawhrimna leh taimakna chhuanawm a tih thu sawiin, he'ng tehna te hi Sawrkar damdawi in pantu damlote chu a chhawr tangkai bertu tur an nih thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PMMY

Dahkham ngai lova loan lak theihna, “Pradhan Mantri Mudra Yojana” chu kum 2024-25 financial year chhung khan mi sing 1, sang 4, 800 bawr vel hnenah pek chhuah a ni. Akashvani Regional News Unit-in Pradhan Mantri Mudra Yojana (PMMY) kum 10 tlinna puala Bank hrang hrang hotute a kawmnaah, PMMY hman tangkai a nih thu hi an sawi a, Mizoram Rural Bank, Kolasib MRB RSETI, Director C. Laldampaia chuan Sorkar laipui PMMY tum lian pui pui 4 a neih thu a sawi a- mitin huap banking service siam a ni a ti. Mi in sum a thawh chhuah theihna tura chhawmdawl na pek, mitin in midang pur lova anmahni kutke a an din theihna tura pawisa tlem te an lo neih theihna tura ruahmanna siam leh bank ah pawisa an duh zat ang lak theih loh avanga pawisa pukna kalphung awm hran lova mi hausa zawk te pawisa a pung awm puk sakna thleng thin tihbo chu a tum ber a ni a ti.

Mizoram Rural Bank, Manager (Advances), Freddy VL Muanpuia Fanai chuan PMMY chu ram mipuiten an tangkaipui hle a ti a, PMMY hnuaiah ram pumah mi vbc 23 chuang hnenah loan cheng vbc nuai 22, 662 vel pek chhuah a ni tawh tih sawiin PMMY chu chi thuma thliar a ti a ti a, cheng sing 5 thleng loan lak theihna - Shishu, cheng sing 5 atanga cheng nuai 5 thleng loan lak theihna- Kishor leh cheng nuai 5 atanga cheng nuai 10 thleng loan lak theihna Tarun ah te then hran a ni a ti.

Sorkar laipui pawhin ram mipuiten hamthatna an dawn nasat zia a hriat avangin 2024-25 Union Budget ah cheng nuai 20 thleng loan lak theihna Tarun+ dang an duang leh tih a sawi a. Mizoram mipuite pawhin PMMY hi an tangkaipui hle tih sawiin kum 2024-25 financial year chhung khan mi sing 1, sang 4, 800 bawr vel hnenah PMMY loan pek chhuah a ni tawh a ti a, loan latute chu sorkar guarantor ah a tan avanga inthlahdah mai lovin, loan an rulh that loh chuan loan dang an lak leh theih loh phah thin avangin loan rul tha turin a chah a ni.

<><><>

PM

Prime Minister Narendra Modia chuan ramchhung sector hrang hrangah hmasawnna ropui tak hmuh tur a awm a ti.Mipui vaibelchhe 140 chuangte thawhrimna vangin heng hmasawnna te hi a hlawhtling tih a sawi a. NDA sawrkar kum 11 tlin puala Social media-a a thudahah Pu Modi chuan kum 10 chhungin NDA sawrkarin chak tak leh zau takin hmasawnna a thlen tih a sawi a. Eibar zawnna kawnga hmasawnna mai bakah khawtlanga mi hnuaihnungte chawikan kawngahte, mipui awn hmasawnna kalpui a ni a ti a. India chu khawvelah economy lian mai ni loin khawvel thilthleng pawimawhah a ngaihdante an ngai pawimawh hle a ni a ti. NaMo App kaltlangin video, infographics leh article kaltlanga India hmasawnna te lo thlir ve turin a ngen a ni.

<><><>

NDA @11 YEARS NE

Kum 11 chhungin hmarchhak hmasawnna turin sawrkarin sum tam tak a seng tawh a. Hmasawnna ruhrel mai bakah mipuite kaltlangin hmasawnna a thlen a. Flagship scheme PM-DevINE, North East Special Infrasructure Development Scheme leh Aspirational District Programme te chuan a bulthutah hmasawnna a thlen a. Zirna leh hriselna lamah nasa taka hmasawn a ni a. Ziak leh chhiar thiam an pung a, Mizoram chu ULLAS Mission hnuaiah ziak leh chhiar thiam vek state ah puan a ni tawh a. Assam in Asia chhimlama Cancer enkawlina changtlung ber leh lian ber Hospital 15 inzawmkhawm a nei dawn bawk a ni.

<><><>

MANIPUR

Manipur Chief Minister hlui N. Biren Singh leh Rajya Sabha MP Leishemba Sanajaoba te chuan nimin khan Imphal chhuahsanin New Delhi-ah sawrkar laipui hotute hmu turin an kal. N. Biren Singh-a te hian Manipur state-a buaina chhuak thar leh chungchang hi an hotute an sawipui dawn a. Inrinni zana CBI ten May 2023 atanga intan tawh Manipur buaina kaihhnawihah Arambai Tenggol hrulaitu an man avangin Manipur Valley district-ah buaina a chhuak leh a ni.

<><><>